



西吳 補正

吳越 校勘

吳越 校勘

吳越 校勘

吳越 校勘

吳越 校勘

吳越 校勘

吳越 校勘

吳越 校勘

古樂苑卷第三十六

西吳 梅鼎祚 補正

東越 呂胤昌 校閱

襍曲歌辭 宋

自君之出矣

漢徐幹室思詩自君之出矣明鏡暗不治思君如流水無有窮已時自君

之出矣蓋起於此一作擬室思詩齊虞羲亦謂之思君去時行

宋孝武帝 一作許瑤

自君之出矣金翠闇無精思君如日月回還晝夜生

同前

江夏王義恭

自君之出矣筇錦廢不開思君如清風曉夜常徘徊



同前

顏師伯

自君之出矣芳帷低不舉思君如同雪流亂無端緒

同前

本題云題詩後寄行人姑從郭本

鮑令暉

自君之出矣臨軒不解顏砧杵夜不發高門晝恒關帷
中流熠燿庭前華紫蘭物枯識節異鴻歸知客寒遊取
暮春盡餘思獨君還

一作遊用暮冬盡除春待君還帷一作帳歸一作來

同前

二首集云奉和代徐

齊王融

自君之出矣芳蕤絕瑤卮思君如形影寢興未曾離
自君之出矣金爐香不然思君如明燭中宵空自煎

同前

虞羲

自君之出矣楊柳正依依君去無消息唯見黃鶴飛關
山多險阻士馬少光輝流年無止極君去何時歸

同前

梁范雲

自君之出矣羅帳咽秋風思君如蔓草連延不可窮

同前

六首

陳後主

自君之出矣霜暉當夜明思君若風影來去不曾停

自君之出矣房空帷帳輕思君如晝燭懷心不見明

自君之出矣不分道無情思君若寒草零落故心生

自君之出矣塵網暗羅帷思君如落日無有暫還時

自君之出矣綠草遍階生思君如夜燭垂淚著雞鳴

自君之出矣愁顏難復覩思君如蘂條夜夜只交苦

同前

賈馮吉

自君之出矣紅顏轉憔悴思君如明燭煎心且銜淚

同前

隋陳叔達

自君之出矣明鏡罷紅妝思君如夜燭煎淚幾千行

秋歌

藝文無題
在秋部

宋南平王鐔

昊天清且高秋氣發初涼白露下微津明月流素光凝
煙沉城闕淒風入軒房朱華先零落綠草就芸黃織羅
還寄篋輕紈改衣裳

闕

遊子移

宋江夏王義恭

三河遊蕩子。麗顏邁荆寶。携持玉柱箏。懷扶忘憂草。綢繆甘泉中。馳逐邯鄲道。春服候時製。秋紈迎涼造。珍魄暉素腕。玉迹滿襟抱。常歎樂日晏。恒悲歡不早。揮吹傳舊美。趨謠盡新好。仲尼爲輟食。秦王足傾倒。

懷園引

宋謝莊

鴻飛從萬里。飛飛河岱起。辛勤越霜霧。聯翩遡江汜。去舊國。違舊鄉。舊海悠且長。迴首瞻東路。延翮向秋方。登楚都。入楚關。楚地蕭瑟楚山寒。歲去水未已。春來鴈不還。風肅幌兮露濡庭。漢水初綠柳葉青。朱光靄靄雲英英。離禽啾啾又晨鳴。菊有秀兮松有蕤。憂來年去客髮

哀流陰逝景不可追。臨堂危坐悵欲悲。試託意兮向芳
蓀。心綿綿兮屬荒樊。想綠蘋兮旣冒沼。念幽蘭兮已盈
園。天桃晨暮發。春鶯旦夕喧。青苔無石路。宿草塵蓬門。

山夜憂

宋謝莊

庭光盡山明。歸流風乘軒卷。明月緣河飛。澗鳥鳴兮夜
蟬清。橘露靡兮蕙煙輕。凌別浦兮值泉躍。經喬木兮遇
猿驚。南臯別鶴行。佇漢東鄰孤管入。青天沈疴白髮共
急日。朝露過隙詎賒年。年旣去兮髮不還。金膏玉液豈
留顏。迴舫柝繩戶。收棹掩荆關。

會吟行

樂府解題曰會吟行其致與吳趨同會謂會稽

宋謝靈運

六引緩清唱三調佇繁音列筵皆靜寂咸共聆會吟會
吟自有初請從文命敷敷績壺冀始刊木至江汜列宿
炳天文負海橫地理連峰競千仞背流各百里滌池漑
粳稻輕雲陵松杞兩京愧佳麗三都豈能似層臺指中
天高墉積崇雉飛燕躍廣途鷁首戲清沚肆呈窈窕容
路曜嫵媚子自來彌世代賢達不可紀句踐善廢興越
叟識行止范蠡出江湖梅福入城市東方就旅逸梁鴻
去桑梓牽綬書土風辭殫意未已

容五臣作客
世一作年

松柏篇

并序

余患脚上氣四十餘日知舊先借傳玄集以余
病劇遂見還開袞適見樂府詩龜鶴篇於危病

中見長逝詞惻然酸懷抱如此重病彌時不
差呼吸之喘舉目悲矣火藥間缺而擬之

宋鮑照

松柏受命獨歷代長不衰人生浮且脆孰若晨風悲東
海迸逝川西山導落暉南郭悅籍短蒿里收永歸諒無
疇昔時百病起盡期志士惜牛刀忍勉自療治傾家行
藥事顛沛去迎醫徒備火石苦奄至不得辭龜齡安可
獲岱宗限已迫睿聖不得畱爲善何所益捨此赤縣居
就彼黃墟宅永離九原親長與三辰隔屬續生望盡闔
棺世業埋事痛存人心恨結亾者懷祖葬旣云及壙塋
亦已開室族內外哭親疏同共哀外姻遠近至名列通

夜臺扶輿出殯宮低迴戀庭室天地有盡期我去無還
日居者今已盡人事從此畢火歇煙旣沒形銷聲亦滅
鬼神來依我生人永辭訣大暮杳悠悠長夜無時節鬱
湮重冥下煩冤難具說安寢委沈寔戀戀念平生事業
有餘結刊述未及成資儲無擔石兒女皆孩嬰一朝放
捨去萬恨纏我情追憶世上事束教以自拘明發靡怡
念夕歸多憂虞撤閑晨逕流輟宴式酒濡知今瞑日苦
恨失爾時娛遙遙遠民居獨埋深壤中墓前人跡滅冢
上草日豐空林響鳴蜩高松結悲風長寐無覺期誰知
逝者窮生存處交廣連榻舒華裯已沒一何苦楮哉不

容身昔日平居時晨夕對六親今日掩奈何一見無諸
因禮席有降殺三齡速過隙几筵就收撤室宇改疇昔
行女遊歸途仕子復王役家世本平常獨有亾者劇時
祀望歸來四節靜坐丘孝子撫墳號父子知來不欲還
心依戀欲見絕無由煩冤荒隴側肝心盡崩抽

郭一作郊限一

作恨夕歸
一作久歸

鳴鴈行

衛匏有苦葉詩曰雝雝鳴鴈
旭日始旦鳴鴈行蓋出於此

宋鮑照

雝雝鳴鴈鳴始旦齊行命侶入雲漢中夜相失羣離亂
留連徘徊不忍散憔悴容儀君不知辛苦霜雪亦何爲

霜雪一作風霜

同前

隋李孝貞

聽琴旋蔡子張羅避翟公夕宿寒林上朝飛空井中既
竝玄雲曲復變海魚風一報黃苑惠還遊萬歲宮

詩紀云此

詩本詠雀樂府題曰鳴雁行或有誤也

北風行

北風本衛詩也北風詩曰北風其涼雨雪其零傳云北風寒涼病害萬物以喻君政暴虐百姓不親也鮑照傷北風雨雪而行人不歸與衛詩異矣集作北風涼行

宋鮑照

北風涼雨雪零京洛女兒多妍粧遙豔帷中自悲傷沈
吟不語若爲忘問君何行何當歸苦使妾坐自傷悲慮

年至慮顏衰情易復恨難追

沈吟不語若爲忘一作沈吟不語若有忘慮年至一

作慮年來

春日行

宋鮑照

獻歲發吾將行春山茂春日明園中鳥多嘉聲梅始發
柳始青汎舟艫齊棹驚奏採菱歌鹿鳴風微起波微生
弦亦發酒亦傾入蓮池折桂枝芳袖動芬葉披兩相思

兩不知

梅始發柳始青一作梅始發桃始榮風微起返微生一作微波起微風生入蓮池折桂枝一作

入蓮花援桂枝

代少年時至衰老行

此下五首樂府諸家不載按鮑照集題上並有代字則此

必舊有是作而照擬之也大抵爲嗟老傷窮羈旅無聊之意而已

宋鮑照

憶昔少年時馳逐好名晨結友多貴門出入富兒鄰綺
羅豔華風車馬自揚塵歌唱青琴女彈箏燕趙人好酒
多芳氣餽味厭時新今日每相念此事邈無因寄語後
生子作樂當及春

代陽春登荆山行

宋鮑照

旦登荆山頭崎嶇道難遊早行犯霜露苔滑不可留極
眺入雲表窮目盡帝州方都列萬室層城帶高樓奕奕
朱軒馳紛紛縞衣流日氛映山浦暄霧逐風收花木亂
平原桑柘盈平疇攀條弄紫莖藉露折芳柔遇物雖成

趣念者不解憂且共傾春酒長歌登山丘

桑柘盈平疇一作桑柘縣

平疇

代貧賤愁苦行

宋鮑照

湮沒雖久悲貧苦卽生劇長歎至天曉愁苦窮日夕盛
顏當少歇髣髴先老白親友四面絕朋知斷三益空庭
慙樹萱樂餌愧過客貧年忘日時黷顏就人惜俄頃不
相酬慙怩面已赤或以一金恨便成百年隙心爲千條
計事未見一獲運圯津塗塞遂轉歟溝洫以此窮百年
不如還窶窶

代邊居行

宋鮑照

少年遠荆陽遙遙萬里方陋巷絕人徑茅屋摧山岡
不覩車馬迹但見麋鹿場長松何落落丘隴無復行邊
地無高木蕭蕭多白楊盛年日月盡一去萬恨長悠悠
世中人爭此錐刀忙不憶貧賤時富貴輒相忘紛紛徒
滿目何闕慨予傷不如一畝中高會挹清漿遇樂便作
樂莫使候朝光

荆一作京
方一作行

代邽街行

宋鮑照

竚立出門衢遙望轉蓬飛蓬去舊根在連翩逝不歸念
我捨鄉俗親好久乖違慷慨懷長想惆悵戀音徽人生
隨事變遷化焉可祈百年難必果千慮易盈虧

中興歌

十首

宋鮑照

千冬遲一春萬夜視朝日生平值中興歡起百憂畢

遲一作逢

逢作

中興太平運化清四海樂祥景照玉臺紫煙遊鳳閣
碧樓含夜月紫殿爭朝光綵池散蘭麝風起自生芳
白日照前牕玲瓏綺羅中美人掩輕扇含思歌春風
三五容色滿四五妙華歇已輸春日歡分隨秋光沒
北出湖邊戲前還苑中遊飛轂繞長松馳管逐波流
九月秋水清三月春花滋千金逐良日皆兢中興時
窮泰已有分壽夭復屬天既見中興樂莫持憂自煎

襄陽是小地壽陽非帝城今日中興樂遙冶在下京

梅花一時豔竹葉千年色願君松柏心採照無虧極

行路難

十八首樂府解題曰行路難備言世路艱難及離別悲傷之意多以君不見爲首按

陳武別傳云武常牧羊諸家牧豎有知歌謠者武遂學行路難則所起亦遠矣

宋鮑照

奉君金巵之美酒璊瑁玉匣之彫琴七綵芙蓉之羽帳

九華蒲萄之錦衾紅顏零落歲將暮寒光宛轉時欲沈

願君裁悲且減思聽我抵節行路吟不見柏梁銅雀上

寧聞古時清吹音

巵一作匣璊一作玳

洛陽名工鑄爲金博山千斲復萬鏤上刻秦女攜手仙承

君清夜之歡娛列置幃裏明燭前外發龍鱗之丹綵內
含麝芬之紫煙如今君心一朝異對此長歎終百年

歡娛

一作
娛樂

璿閨玉墀上椒閣文牕繡戶垂綺幕中有一人字金蘭
被服纖羅蘊芳藿春燕差池風散梅開帷對影弄春爵
含歌攬涕不能言人生幾時得爲樂寧作野中之雙鳬
不願雲間之別鶴

蘊一作采春一作禽
不能言一作恒抱愁

瀉水置平地各自東西南北流人生亦有命安能行歎
復坐愁酌酒以自寬舉杯斷絕歌路難心非木石豈無
感吞聲躑躅不敢言

君不見河邊草冬時枯死春滿道君不見城上日非暝
汝山去明朝復更出今我何時當得然一去永滅入黃
泉人生苦多懽樂少意氣敷腴在盛年且願得志數相
就牀頭恒有酤酒錢功名竹帛非我事存亡貴賤委皇
天

非暝一作今暝山
一作盡委一作付

對案不能食拔劒擊柱長歎息丈夫生世能幾時安能
蹀躞垂羽翼棄檄罷官去還家自休息朝出與親辭暮
還在親側弄兒牀前戲看婦機中織自古聖賢盡貧賤

何況我輩孤且直

能一作會
檄一作置

愁思忽而至跨馬出北門舉頭四顧望但見松柏園荆

棘鬱蹲蹲中有一鳥名杜鵑言是古時蜀帝魂聲音哀
苦鳴不息羽毛憔悴似人髭飛走樹間啄蟲蟻豈憶往
日天子尊念此灰生變化非常理中心惻愴不能言

蹲蹲

集作蹲蹲
啄一作逐

中庭五株桃一株先作花陽春沃若二三月從風簸蕩
落西家西家思婦見悲惋零淚沾衣撫心歎初我送君
出戶時何言淹留節迴換牀席生塵明鏡垢纖腰瘦削
髮蓬亂人生不得恒稱意惆悵徙倚至夜半

沃若二三
月一作妖

冶二月中見
悲一作見之

劉蕤染黃絲黃絲歷亂不可治我昔與君始相值爾時

自謂可君意結帶與我言死生好惡不相置今日見我
顏色衰意中索寞與先異還君金釵瑋簪不忍見之

益愁思

結帶與我言死生好惡不相置一作結帶與君同死生好惡不擬相棄置索寞一作錯亂金一

作玉見之

一作見此

君不見薜華不終朝須臾淹冉零落銷盛年妖豔浮華
輩不久亦當詣冢頭一去無還期千秋萬歲無音詞孤
魂煢煢空隴間獨魄徘徊遶墳基但聞風聲野鳥吟豈
憶平生盛年時爲此令人多悲悵君當縱意自熙怡
君不見枯籜走階庭何時復青著故莖君不見亾靈蒙
享祀何時傾盃竭壺罌君當見此起憂思寧及得與時

人爭生人倏忽如絕電華年盛德幾時見但令縱意存
高尚旨酒佳肴相胥讌持此從朝竟夕暮差得忘憂消
愁怖胡爲惆悵不得已難盡此曲令君忤

得一作能

今年陽初花滿林明年冬末雪盈岑推移代謝紛交轉
我君邊戍獨稽沈執袂分別已三載邇來淹寂無分音
朝悲慘慘遂成滴暮思遶遶最傷心膏沐芳餘久不御
蓬首亂髻不設簪徒飛輕埃舞空帷粉黛器靡復遺
自生留世苦不幸心中惕惕恒懷悲

春禽啾啾日暮鳴最傷君子憂思情我初辭家從軍僑
榮志溢氣干雲霄流浪漸冉經三齡忽有白髮素髭生

今暮臨水拔已盡明日對鏡復已盈但恐羈歟爲鬼客
客思寄滅生空精每懷舊鄉野念我舊人多悲聲忽見
過客問何我寧知我家在南城答云我曾居君鄉知君
遊宦在此城我行離邑已萬里今方羈役去遠征來時
聞君婦閨中孀居獨宿有貞名亦云朝悲泣閑房又聞
暮思淚沾裳形容憔悴非昔悅蓬髮衰顏不復粧見此
令人有餘悲當願君懷不暫忘

君不見少壯從軍去白首流離不得還故鄉窅窅日夜
隔音塵斷絕阻河關朔風蕭條白雲飛胡笳哀急邊氣
寒聽此愁人今奈何登山遠望得留顏將死胡馬跡寧

見妻子難男兒生世輒軻欲何道綿憂摧抑起長歎

君不見柏梁臺今日丘墟生草萊君不見阿房宮寒雲
澤雉棲其中歌伎舞女今誰在高墳壘壘滿山隅長袖
紛紛徒競世非我昔時千金軀隨酒逐樂任意去莫令
含歎下黃壚

君不見冰上霜表裏陰且寒雖蒙朝日照信得幾時安
民生故如此誰令摧折彊相看年去年來自如削白髮
零落不勝冠

君不見春鳥初至時百草含青俱作花寒風蕭條一旦
至竟得幾時保光華日月流邁不相饒令我愁思怨恨

多蕭條一作蕭索

諸君莫歎貧富貴不由人丈夫四十彊而仕余當二十
弱冠辰莫言草木萎大雪會應蘇息遇陽春對酒叙長
篇窮途運命委皇天但願金樽九醞滿莫惜牀頭百箇
錢直須優游卒一歲何勞辛苦事百年大一作冬金樽一作樽中

同前

詩品曰行路難是東陽柴廓所造寶月嘗憩其家會廓亡因竊而有之廓子齊手本出都欲訟此事乃厚賂止之一本云東陽太守柴廓選詩外編作柴廓詩

齊僧寶月

君不見孤鴈關外發酸嘶度揚越空城客子心腸斷幽
閨思婦氣欲絕凝霜夜下拂羅衣浮雲中斷開明月夜

樂府 卷三
夜遙遙徒相思年年望望情不歇寄我匣中青銅鏡倩
人爲君除白髮行路難行路難夜聞南城漢使度使我
流淚憶長安

同前

四首

梁吳均

洞庭水上一株桐經霜觸浪困嚴風昔時抽心曜白日
今日臥死黃沙中洛陽名工見咨嗟一剪一刻作琵琶
白璧規心學明月珊瑚映面作風花帝王見賞不見忘
提攜把握登建章掩抑摧藏張女彈殷勤促柱楚明光
年年月月對君子遙遙夜夜宿未央未央綵女棄鳴篴
爭先拂拭生光儀茱萸錦衣玉作匣安念昔日枯樹枝

不學衡山南嶺桂至今千載猶未知

青瑣門外安石榴連枝接葉夾御溝金墉城西合歡樹
垂條照彩拂鳳樓遊俠少年遊上路傾心顛倒想戀慕
摩頂至足買片言開胃瀝膽取一顧自言家在趙邯鄲
翩翩舌杪復劍端青驪白駃的盧馬金羈綠控紫絲鞵
蹀躞橫行不肯進夜夜汗血至長安長安城中諸貴臣
爭貴儒者席上珍復聞梁王好學問輕棄劍客如埃塵
吾丘壽王始得意司馬相如適被申大才大辯尚如此
何況我輩輕薄人

君不見西陵田從橫十字成陌阡君不見東郊道荒涼

樂府 卷三十六 十四
蕪沒起寒煙盡是昔日帝王處歌姬舞女達天曙今日
翩妍少年子不知華盛落前去吐心吐氣許他人今日
迴惑生猶豫山中桂樹自有枝心中方寸自相知何言
歲月忽若馳君之情意與我離還君玳瑁金雀釵不忍
見此使心危

君不見上林苑中客冰羅霧縠象牙席盡是得意忘言
者探腸見膽無所惜白酒甜鹽甘如乳綠觴皎鏡華如
碧少年持名不肯嘗安知白駒應過隙博山鑪中百和
香鬱金蘇合及都梁逶迤好氣佳容貌經過青瑣歷紫
房已入中山馮后帳復上皇帝班姬牀班姬失寵顏不

開奉筵供養長信臺日暮耿耿不能寐秋風切切四面
來玉階行路生細草金鑪香炭變成灰得意失意須臾
頃非君方寸逆所裁

馮一作陰
頃一作間

同前

二首前首一作
吳均今從玉臺

梁費咏

君不見長安客舍門倡家少女名桃根貧窮夜紡無燈
燭何言一朝奉至尊至尊離宮百餘處千門萬戶不知
曙唯聞啞啞城上烏玉欄金井牽轆轤丹梁翠柱飛屠
蘇香薪桂火炊雕胡當年翻覆無常定薄命爲女何必

麤屠

一作流雕
胡一作彫菰

君不見人生百年如流電心中坎壈君不見我昔初入

椒房時詎減班姬與飛燕朝踰金梯上鳳樓暮下瓊鉤
息鸞殿柏梁晝夜香錦帳自飄颺笙歌棗下曲琵琶陌
上桑過蒙恩所賜餘光曲沾被既逢陰后不自專復值
程姬有所避黃河千年始一清微軀再逢永無議蛾眉
偃月徒自妍傅粉施朱欲誰爲不如天淵水中鳥雙去
雙飛長比翅

棗下曲一作
作席上吹

同前

一作詠征婦
裁衣行路難

梁王筠

千門皆閉夜何央百憂俱集斷人腸探揣箱中取刀尺
拂拭機上斷流黃情人逐情雖可恨復畏邊遠之衣裳
已綯一蠶催衣縷復擣百和薰衣香猶憶去時腰大小

不知今日身短長
襦襦雙心共一袂
袒腹兩邊作八撮
襟帶雖安不忍縫
開孔裁穿猶未達
曾前却月兩相連
本照君心不照天
願君分明得此意
勿復流蕩不如先
含悲含怨判不死
封情忍思待明年

同前

題云從軍與相州刺史孫騰行路難

北齊高昂

春甲長驅不可息
六日六夜三度食
初時言作虎牢
更被處置河橋北
迴首絕望便蕭條
悲來雪涕還自抑

空城雀

鮑照此篇言輕飛近集如腹辛傷免羅網而已

宋鮑照

雀乳四轂空城之阿
朝拾野粟夕飲冰
河高飛畏鴟鵂
下飛畏網羅
辛傷伊何言
怵迫良已多
誠不及青鳥遠

食玉山禾猶勝吳宮燕無罪得焚窠賦命有厚薄長歎

欲如何

拾一作食

同前

北魏高孝緯

百雉何寥廓四面風雲上紈素久爲塵池臺尚可仰啾

啾雀噪城鬱鬱無歡賞日暮勞心曲橫琴聊自獎

勞一作榮

夜坐吟

夜坐吟鮑照所作言聽歌逐音因音託意也宗夫又有遙夜吟則言永夜獨吟憂思

未歇與

此不同

宋鮑照

冬夜沈沈夜坐吟含情未發已知心霜入幕風度林朱

燈滅朱顏尋體君歌逐君音不貴聲貴意深

情一作聲

長相思

古詩曰客從遠方來遺我一書札上言長相思下言久離別李陵詩曰行人難久留

各言長相思言行人久成寄書以遺所思也古
詩又曰客從遠方來遺我一端綺文綵雙鴛鴦
裁爲合歡被著以長相思緣以結不解謂被中
著綿以致相思縣縣之意故曰長相思也又有
千里思與
此相類

宋吳邁遠

晨有行路客依依造門端人馬風塵色知從河塞還時
我有同棲結宦遊邯鄲將不異客子分飢復共寒煩君
尺帛書寸心從此殫道妾長憔悴豈復歌笑顏簷隱千
霜樹庭枯十載蘭經春不舉袖秋落寧復看一見願道
意君門已九關虞卿棄相印檐笠爲同歡閨陰欲早霜
何事空盤桓

道一作遣
笠一作簪

同前

梁昭明太子統

相思無終極長夜起歎息徒見貌嬋娟寧知心有憶寸

心無所因願附歸飛翼

嬋一作嬋所一作以

同前

二首

張率

長相思久離別美人之遠如雨絕獨延佇心中結望雲
雲去遠望鳥鳥飛滅空望終若斯珠淚不能雪

長相思久別離所思何在若天垂鬱陶相望不得知玉
階月夕映羅帷風夜吹長思不能寢坐望天河移

同前

二首

陳後主

長相思久相憶關山征戍何時極望風雲絕音息上林
書不歸迴紋徒自織羞將別後面還似初相識

長相思怨成悲蝶縈草樹連絲庭花飄散飛入帷帷中
看隻影對鏡歛雙眉兩見同望月兩別共春時

同前 二首

徐陵

長相思望歸難傳聞奉詔成臯蘭龍城遠鴈門寒愁來
瘦轉劇衣帶自然寬念君今不見誰爲抱腰看

奉詔一作傳制

念君今不見一作君今念不見

長相思好春節夢裏恒啼悲不洩帳中起牕前髻柳絮
飛還聚遊絲斷復結欲見洛陽花如君隴頭雪

同前

蕭渾

長相思久離別新燕參差條可結空關遠鴈書絕對雲

恒憶陣看花復愁雪猶有望歸心流黃未剪截

同前

陸瓊

長相思久離別一罷鴛文綺薦絕鴻已去柳堪結室冷
鏡疑冰庭幽花似雪容貌朝朝改書字看看滅

同前

王璩

長相思久離別兩心同憶不相徹悲風悽愁雲結柳葉
眉上銷菱花鏡中滅鴈封歸飛斷鯉素還流絕

悽一作妻

同前

江揔

長相思久離別征夫去遠芳音滅湘水深隴頭咽紅羅
斗帳裏綠綺清弦絕逶迤百尺樓愁思三秋結

芳音一作芳幽

長相思久別離春風送燕入簷窺暗開脂粉弄花枝紅
樓千愁色玉筍兩行垂心心不相照望望何由知

同前

無名氏

罷秋有餘慘還春不覺溫詎知玉筵側長挂銷愁人

長別離

楚辭曰悲莫悲兮生別離古詩曰行行重
行行與君生別離相去萬餘里各在天一

涯後蘇武使匈奴李陵與之詩曰良時不可再
離別在須臾故後人擬之爲古別離梁簡文帝
又爲生別離宋吳邁遠有長別離今按
三曲原本同義而宋在梁前聊以爲次

宋吳邁遠

生離不可聞況復長相思如何與君別當我盛年時蕙
華每搖蕩妾心長自持榮乏草木歡悴極霜露悲富貴

貌難變貧窮顏易哀持此斷君腸君亦宜自疑淮陰有
逸將折羽謝翻飛楚有扛鼎士出門不得歸正爲隆準
公仗劒入紫微君才定何如白日下爭暉

長一作空
貌一作身

古別離

雜體詩
第一首

梁江淹

遠與君別者乃至鴈門關黃雲蔽千里遊子何時還送
君如昨日簷前露已團不惜蕙草晚所悲道里寒君在
天一涯妾身長別離願一見顏色不異瓊樹枝兔絲及
水萍所寄終不移

生別離

梁簡文帝

別離四弦聲相思雙笛引一去十三年復無好音信

淫思古意

宋顏竣

春風飛遠方紀轉流思堂貞節寄君子窮閨妾所藏裁
書露微疑千里問新知君行過三稔故心久當移

楊花曲

三首

宋湯惠休

歲華結情宛轉風含思掩涕守春心折蘭還自遺
江南相思引多歎不成音黃鶴西北去銜我千里心
深堤下生草高城上入雲春人心生思思心長爲君

秋思引

宋湯惠休

秋寒依依風過河白露蕭蕭洞庭波思君未光光已滅
眇眇悲望如思何

勞歌

二首

宋伍緝之

幼童輕歲月謂言可久長一朝見零悴歎息向秋霜迤
邐已窮極疾病復不康每恐先朝露不見白日光庶及
盛年時暫遂情所望吉辰既乖越來期眇未央促促歲
月盡窮年空悲傷

女蘿依附松終已冠高枝浮萍生託水至死不枯萎傷
哉抱關士獨無松與期月色似冬草居身苦且危幽生
重泉下窮年冰與澌多謝負郭生無所事六奇勞爲社
下宰時無魏無知

同前

周蕭撫

百年能幾許公事罷平生寄言任立政誰憐李少卿

答孫緬歌

南史曰漁父者不知姓名亦不知何許人太康孫緬爲潯陽太守落日逍遙者

際見一輕舟凌波隱顯俄而漁父至神韻蕭灑垂綸長嘯緬甚異之褰裳涉水與之論用世之道漁父曰僕山海狂人不達世務未辨賤貧無論榮貴乃歌曰云云於是攸然鼓棹而去

宋漁父

竹竿籊籊河水湫湫相忘爲樂貪餌吞鈎非夷非惠聊以忘憂

樂苑

卷三十六

三

樂苑卷三十六終

古樂苑卷第三十七

西吳 梅鼎祚 補正

東越 呂胤昌 校閱

襍曲歌辭 齊

塞客吟

齊書曰高帝在淮上取蘇侃爲冠軍錄事參軍是時新失淮北遣帝北戍每歲秋冬間邊淮騷動帝廣遣偵候安集羸餘又營繕城府帝在兵中久見疑於時乃作塞客吟以喻志侃達此旨更自勸勵委以府事深見知待按此詩見蘇侃傳外編逸軌皆作侃詩非也

齊高帝

寶緯紊宗神經越序德晦河晉力宣江楚雲雷兆壯天
山繇武直髮指河關凝精越漢渚秋風起寒草哀雕鴻

思邊馬悲平原千里顧但見轉蓬飛星嚴海淨月徹河
明清輝映幙素液凝庭金笳夜厲羽轄晨征幹晴潭而
悵泗漦松洲而悼情蘭涵風而瀉豔菊籠泉而散英曲
繞首燕之歎吹軫絕越之聲欹園琴之孤弄想庭藿之
餘馨青關望斷白日西斜恬源靚霧攏首暉霞戒旋鷁
躍還波情綿綿而方遠思裊裊而遂多粵擊秦中之筑
因爲塞上之歌歌曰朝發兮江泉日夕兮陵山驚飈兮
澌汨淮流兮潺湲胡埃兮雲聚楚旆兮星懸愁壙兮思
宇惻愴兮何言定寰中之逸鑒審雕陵之迷泉悟樊籠
之或累悵遐心以栖玄

河關一作秦關

永明樂

十首南齊書樂志曰永明樂歌者竟陵王子良與諸文士造奏之人爲十曲道人釋

寶月辭頗美武帝常被之筦弦而不列於樂官按此曲永明中造故曰永明樂

齊謝朓

帝圖開九有皇風浮四溟永明一爲樂咸池無復靈
民和禮樂富世清歌頌徽鴻名軼卷領稱首邁垂衣
朱臺鬱相望青槐紛馳道秋雲湛甘露春風散芝草
龍樓日月照溜館風雲清儲光溫似玉藩度式如瓊
化洽鯁海君恩變龍庭長西北驚環裘東南盡龜象
出車長洲苑選旅朝夕川絡絡結雲騎弈弈汎戈船
燕駟遊京洛趙服麗有輝清歌留上客妙舞送將歸

實相薄五禮妙花開六塵明祥已玉燭寶瑞亦金輪
生茂苾蘿性身與嘉惠隆飛纓入華殿屣步出重宮
彩鳳鳴朝陽玄鶴舞清商瑞此永明曲千載爲金皇

同前

十首

王融

玄符昭景歷茂實偶英聲長爲南山固永與朝日明
靈丘比翼栖芳林合條起兩代分憲章一朝會書軌
二離金玉相三袞蘭蕙芳重儀文世子再奉東平王
空谷返逸驂陰山響鳴鶴振玉躡丹墀懷芳步青閣
崇文晦已明膠庠襍復整弱臺留折巾沂川詠芳穎
定林去喧俗鹿野出埃霞香風流梵瑄澤雨散雲花

楚望傾滄滌日館仰鑾鈴已晞五雲發方照兩河清
幸哉明盛世壯矣帝王居高門夜不析飲帳曉長舒
揔棹金陵渚方駕玉山阿輕露炫珠翠初風搖綺羅
西園抽蕙草北沼掇芳蓮生逢永明樂歿日生之年

同前

梁沈約

聯翩賢遊子侈靡千金客華轂起飛塵珠履竟長陌

江上曲

齊謝朓

易陽春草出踟躕日已暮蓮葉尚田田淇水不可渡願
子淹桂舟時同千里路千里旣相許桂舟復容與江上
可採菱清歌共南楚

邯鄲故才人嫁爲廝養卒婦

楊慎樂府序曰予觀樂府有邯鄲才人嫁

爲廝養卒婦篇特亡其辭亦失其解及考史記張耳傳洎楚漢春秋并云趙王武臣爲燕軍所獲囚於燕獄先後使者往請輒爲燕所殺趙有廝養卒謝其舍中曰吾將載趙王歸舍中人笑之乃走燕壁以利害說燕將燕以爲然乃歸趙王廝養卒御王以歸武臣歸趙以美人妻養卒以報之是其事也李荃曰張耳傳祇云廝養卒並無才人嫁爲婦語曷以知所嫁者卽此卒邪陳耀文正揚曰此事史漢并同注中俱無楚漢春秋字

齊謝朓

生平宮閣裏出入侍丹墀開笥方羅縠窺鏡比蛾眉初

別意未解去久日生悲顚顚不自識嬌羞餘故姿夢中

忽髮髯猶言承讌私

王孫遊

楚辭招隱士曰王孫遊兮不歸春草生兮萋萋王孫遊蓋出於此

齊謝朓

綠草蔓如絲
襍樹紅英發
無論君不歸
君歸芳已歇

蔓一作

夢

同前

王融

置酒登廣殿
開襟望所思
春草行已歇
何事久佳期

一本

辭同思
公子

金谷聚

齊謝朓

渠碗送佳人
玉杯要上客
車馬一東西
別後思今夕

石崇金谷妓

梁庾肩吾

蘭堂上客至
綺席清絃撫
自作明君辭
還教綠珠舞

法壽樂

十二首一
云法樂辭

齊王融

天長命自短世促道悠悠禪衢開遠駕愛海亂輕舟累
塵曾未極積樹豈能籌情埃何用洗正水有清流

積一作心

右歌本起

百神肅以虔三靈震且越恒耀揜芳霄薰風鏡蘭月丹

榮藻玉墀翠羽文珠闕皓毳非虛來交輪豈徒發

薰風鏡蘭

月一作微風動蘭月
藻一作落恒一作常

右歌靈瑞

韶年春已仲明星夜未央千祀鍾休曆萬國會嘉祥金
容函夕景翠髻佩晨光表塵維淨覺汎俗迺輪皇

右歌下生

襲氣變離宮重柝警曾殿曼響感心神修容展歡宴生
老終已榮死病行當薦方爲淨國遊豈結危城戀

展歡一作轉惟

右歌在宮

春木多病天秋葉少欣榮心骸終委滅親愛暫平生長
風吹北壟迅影急東瀛知三旣情竭得一乃身貞

木一作枝

竭一作暢

右歌四遊

飛策辭國門端儀偃郊樹慈愛徒相思閨中空戀慕夙
隸乖往塗駿足獨歸路舉袂謝時人得道且還顧

一作去

右歌出國

明心弘十力寂慮安四禪青禽承逸軌文驪鏡重川驚
品標遠勝鹿野究清玄不有希世寶何以遵蒙泉

安一作通

驪一作鑣

右歌得道

亭亭宵月流朏朏晨霜結川上不裴回條間亟渝滅靈
知湛常然符應有盈缺感運復來儀且厭人間世

亟渝滅一作

作問生滅符一作俯世音泄

右歌寶樹

一作雙樹

春山玉所府檀林鸞所栖引火歸炎隧挹水自青隄菴

園無異轍祇館有同躋比肩非今古接武豈燕齊春一作春

鸞一

作芳

右歌賢衆

昔余輕歲月茲也重光陰閨中屏鉛黛闕下挂纓簪禪

悅兼芳旨法言戀清琴一異非能辨寵辱誰爲心戀一作忘

寵辱一

作空有

右歌學徒

峻宇臨層穹迢迢踈遠風騰芳清漢裏響梵高雲中金

華紛冉若瓊樹鬱青葱貞心延淨景遂業嗣天宮宇一作岸

冉若一作冉

弱延一作逸

右歌供具

影響未嘗隔晦明殊復親弘慈邈已遠睿后扇高塵區
中禋景福寓外沐深仁萬祀留國祚億兆慶唐民

右歌福應

江臯曲

齊王融

林斷山更續洲盡江復開雲峰帝鄉起水源桐柏來

望城行

齊王融

金城十二重雲氣出表裏萬戶如不殊千門反相似車
馬若飛龍長衢無極已簫鼓相逢迎信哉佳城市

思公子

楚辭九歌曰雷填填兮雨冥冥援欸兮
抗夜鳴風颯颯兮木蕭蕭思公子兮徒離

憂思公子
蓋出於此

齊王融

春盡風颯颯蘭凋木脩脩王孫久爲客思君徒自憂

同前

梁費昶

公子才氣饒凌雲自飄飄東出關雞道西登飲馬橋夕
宴銀爲燭朝燔桂作焦虞卿亦何命窮極苦無聊

同前

北齊邢劭

綺羅日減帶桃李無顏色思君君未歸歸來豈相識

陽翟新聲

隋書樂志曰西涼樂曲陽翟新聲神自
馬之類皆生於胡戎歌非漢魏遺曲也

齊王融

懷春發下蔡含笑向陽城耻爲飛雉曲好作鷓鴣鳴

秋夜長

魏文帝詩曰漫漫秋夜長烈烈北風涼展轉不能寐披衣起彷徨秋夜長其取諸此

集云奉和秋夜

長玉臺作秋夜

齊王融

秋夜長夜長樂未央舞袖拂花燭歌聲繞鳳梁

白日歌

序曰懸象著明莫大于日月而彼日月不能不謝固知無準衰為盛之終盛為衰之始故為白

歌

齊張融

白日白日舒天昭暉數窮則盡盛滿則衰

憂且吟

齊張融

鳴琴當春夜春夜當鳴琴羈人自不樂何似千里心

邯鄲行

通典曰邯鄲戰國時趙國所都自敬侯始都之有叢臺洪波臺在焉邯山名邯盡也

樂府廣題曰
邙鄆舞曲也

齊陸厥

趙女擲鳴琴邙鄆紛躡步長袖曳三街兼金輕一顧有
美獨臨風佳人在遐路相思欲寒社叢臺日已暮

邙鄆歌

詩彙列在
晉無名氏

梁武帝

回顧灞陵上北指邙鄆道短衣妾不傷南山爲君老

南郡歌

齊陸厥

江南可採蓮蓮生荷已大旅鴈向南飛浮雲復如蓋望
美積風露踈麻成襟帶雙珠惑漢臯蛾眉迷下蔡玉齒
徒粲然誰與啟含貝

京兆歌

通典曰京兆馮翊扶風皆古雍州之域秦
始皇以爲內史漢景帝二年分置左右內

史武帝改左內史爲左馮翊右內史爲右扶風後與京兆號三輔

齊陸厥

兔園夾池水脩竹復檀欒不如黃山苑儲胥與露寒邇
迤傍無界岑峯鬱上千上千入翠微下趾連長薄芳露
浸紫莖秋風搖素萼鴈起宵未央雲間月將落照梁桂
兮影裴回承露盤芳光照灼壽陵之街走狐兔金卮玉
盃會銷鑠願奉蒲萄花爲君實羽爵

岑峯一作欽岑

左馮翊歌

齊陸厥

上林滴紫泉離宮赫千戶飛鳴亂鳬鴈參差襍蘭杜比
翼獨未羣連葉誰爲伍一物或難致無云泣易覩

中山孺子妾歌

二首漢書曰詔賜中山靖王子嬪及孺子妾水未央才人歌詩四篇

如淳曰孺子幼少稱孺子妾宮人也顏師古曰孺子王妾之有品號者妾王之衆妾也水其名才人天子內官按此謂以歌詩賜中山王及孺子妾未央才人等爾累言之故云及也而陸厥作歌乃謂之中山孺子妾失之遠矣藝文志又曰臨江王及愁思節士歌詩四篇李夫人及幸貴人歌詩三篇亦皆累辭也

齊陸厥

未央才人中山孺子一笑傾城一顧傾市傾城不自美
傾市復爲容願把陵陽袖披雲望九重

如姬寢臥內班婕坐同車洪波陪飲帳林光宴秦餘歲
暮寒飈及秋水落芙蓉子瑕矯後駕安陵泣前魚賤妾

終已矣君子定焉如

婕一作妾賤妾終已矣一作賤妾恩已畢

未央才人歌

梁庾肩吾

從來守未央轉欲訝春芳
朝風凌日色夜月奪燈光
相逢儻遊豫暫爲卷衣裳

臨江王節士歌

齊陸厥

木葉下江波連秋月照浦雲
歇山秋思不可裁復帶秋
風來秋風來已寒白露驚羅紈
節士慷慨髮衝冠彎弓
挂若木長劒竦雲端

李夫人及貴人歌

齊陸厥

屬車桂席塵豹尾香煙滅
彤殿向薜蘿青蒲復萎絕
坐萎絕對薜蘿臨丹階泣椒
塗寡鶴羈雌飛且止雕梁翠

壁網蜘蛛洞房明月夜對此淚如珠

丹一
作片玉

古樂苑卷第三十七

終

古樂苑卷第三十八

西吳 梅鼎祚 補正

東越 呂胤昌 校閱

襍曲歌辭

梁

東飛伯勞歌

一、二云紹古歌玉臺藝文樂府作古辭

梁武帝

東飛伯勞西飛鷺黃姑織女時相見誰家兒女對門居
開顏發豔照里閭南牕北牖桂月光羅帷綺帳脂粉香
女兒年幾十五六窈窕無雙顏如玉三春已暮花從風
空留可憐誰與同

同前

二首英華作紹古歌

梁簡文帝

翻階蛺蝶戀花情容華飛燕相逢迎誰家總角岐路陰
裁紅點翠愁人心天牕綺井暖徘徊珠簾玉篴明鏡臺
可憐年幾十三四工歌巧舞入人意白日西落楊柳垂
含情弄態兩相知

西飛迷雀東羈雉倡樓秦女乍相值誰家妖麗鄰中止
輕粧薄粉光閭里網戶珠綴曲瓊鉤芳茵翠被香氣流
少年年幾方三六合嬌聚態傾人目餘香落蕊坐相催
可憐絕世誰爲媒

一作爲誰媒

同前

題云擬古應教
英華作簡文帝

劉孝威

雙棲翡翠兩鴛鴦
巫雲洛月乍相望
誰家妖冶折花枝

衫長釧動任風吹金鋪玉鎖瑠璃扉花鈿寶鏡織成衣
美人年幾可十餘含羞騁笑歛風裾珠丸出彈不可追
空留可憐持與誰

衫長句一作蛾眉暇睇使情移全作青玉作綠花鈿句作瓊筵玉筍金縷衣

同前

陳後主

池側鴛鴦春日鶯綠珠絳樹相逢迎誰家佳麗過淇上
翠釵綺袖波中漾雕軒繡戶花恒發珠簾玉砌移明月
年時二七猶未笄轉顧流盼髻鬟低風飛蕊落將何故

可惜可憐空擲度

將一作時

同前

陸瑜

西王青鳥秦女鸞姮娥婺女慣相看誰家玉顏窺上路

粉色衣香襍風度九重樓檻芙蓉華四鄰照鏡菱菱花
新粧年幾纔三五隱幔藏羞臨網戶然香氣歇不飛煙
空留可憐年一年

同前

一作紹
古歌

江揔

南飛烏鵲北飛鴻弄玉蘭香時會同誰家可憐出牕牖
春心百媚勝楊柳銀牀金屋挂流蘇寶鏡玉釵橫珊瑚
年時二八新紅臉宜笑宜歌羞更歛風花一去杳不歸
祇爲無雙惜舞衣

同前

隋辛德源

合歡芳樹連理枝荆王神女乍相隨誰家妖豔蕩輕舟

含嬌轉盼騁風流犀棹蘭橈翠羽蓋雲羅霧縠蓮花帶
女兒年幾十六七玉面新粧映朝日落花從風俄度春
空留可憐何處新

河中之水歌

藝文作
古辭

梁武帝

河中之水向東流洛陽女兒名莫愁莫愁十三能織綺
十四採桑南陌頭十五嫁爲盧家婦十六生兒字阿侯
盧家蘭室桂爲梁中有鬱金蘇合香頭上金釵十二行
足下絲履五文章珊瑚掛鏡爛生光平頭奴子擎履箱
人生富貴何所望恨不早嫁東家王

擎一作提

閭闔篇

張衡西京賦曰表峽闕於閭闔閭闔天門也立高闕以象之薛綜云紫微宮門名曰

閶闔也閶闔篇蓋出於此

梁武帝

西漢本佳妍金馬望甘泉衛尉屯兵上期門曉漏傳猶
重河東賦欲知追神仙羽騎凌雲轉閶闔帶空懸長旗
掃月窟鳳迹輾星躔但使丹砂就能令億萬年

上林

梁昭明太子統

千金駿褭騎萬斤流水車爭遊上林裏高蓋逗春華

一作

苑作

大言

許彥周詩話曰樂府記大言小言詩錄昭明辭而不書始於宋玉何也豈誤耶有說耶按

此則大言細言在宋時亦已載樂府矣詩家直說曰宋玉大言賦并吞四夷飲枯河海跋越九州無所容止小言賦無內之中微物生焉比之無象言之無名視之則渺渺望之則冥冥離婁

爲之歎悶神明不能察其情二賦出於列子皆有託寓梁昭明太子大言詩細言詩雖祖宋玉而無謂君臣賡和以文爲戲

梁昭明太子統

下同

觀修鵬其若轍鮒視滄海之如濫觴經二儀而跼蹐跨六合以翱翔

細言

坐臥鄰空塵憑附蟭螟翼越咫尺而三秋度毫釐而九息

大言

並應令

沈約

下同

隘此大汎庭方知九垓局窮天豈彌指盡地不容足

細言

開館尺桮餘築榭微塵裏蝸角列州縣毫端建朝市

大言

王錫

下同

欲遊五嶽迫不得申杖千里之木鱸橫海之鱗

細言

冥冥藹藹離朱不辯其實步蝸角而三伏經針孔而千
日

大言

王規

下同

俯身望日入下視見星羅噓八風而爲氣吹四海而揚
波

細言

針鋒於焉止息髮秒可以翱翔蚊眉深而易阻蟻目曠而難航

大言

張纘

下同

河流既竭日月俱騰置羅微物動落雲鵬

細言

遨遊蟻目辨輕塵蚊睫成宇蝨如輪

大言

殷鈞

下同

噫氣爲風揮汗成雨聊灼戴山龜欲持探邃古

細言

泥舟毛滴海爲政蝸牛國逍遙輕塵上指辰問南北

春江行

唐郭元振曰春江巴女曲也

梁簡文帝

客行祗念路相爭渡京口誰知堤上人拭淚空揺手

桃花曲

一作蕭子顯

梁簡文帝

但使新花豔得間美人簪何須論後實怨結子瑕心

金樂歌

通志作今樂歌

梁簡文帝

槐香欲覆井楊柳正藏鷗山鑪當無比玉構火牕賒牀頭辟繩結鏡上領巾斜鐵鑊種梁子銅樞生棗花開門拋水柱城按特言家

當一作好柱一作信

同前

集云歌曲名詩

元帝

啼鳥怨別偶曙鳥憶離家石闕題書字金燈飄落花東

方曉星沒西山晚日斜
穀衫迴廣袖團扇掩輕紗
暫借青驄馬來送黃牛車

沒一作渡

同前

房篆

前溪流碧水後渚映青天
登臺臨寶鏡開牕對綺錢
玉顏光粉色羅袖拂金鈿
春風散輕蝶明月映新蓮
摘花競時侶催指及芳年

采菊篇

梁簡文帝

月精麗草散秋株洛陽少婦絕妍姝
相喚提筐采菊珠朝起露濕沾羅襦
東方千騎從驪駒豈不下山逢故夫

喚一作呼
豈一作更

茱萸女

梁簡文帝

茱萸生狹斜結子復銜花
相逢纖手摘濫得映鈿華
襍與鬟簪挿偶逐髻鈿斜
東西爭贈玉縱橫來問家
不無夫婿馬空駐使君車

愛妾換馬

樂府解題曰愛妾換馬舊說淮南王所作疑淮南王即劉安也古辭今不傳

題云和人以妾換馬

梁簡文帝

功名幸多種何事苦生離
誰言似白玉定是媿青驪
必取匣中釧迴作飾金羈
真成恨不已願得路傍兒

同前

題云和王竟陵

劉孝威

驄馬出樓蘭一步九盤桓
小史贖金絡良工送玉鞍
龍

驂來甚易烏孫去實難麟膠妾猶有請爲急弦彈

同前

庾肩吾

渥水出騰駒湘川實應圖來從西北道去逐東南隅琴聲悲玉匣山路泣薜蘿似鹿將含笑千金曾不俱

同前

隋僧法宣

朱鬣飾金鑣紅粧束素腰似雲來蹀躞如雪去飄飄桃花含淺汗柳葉帶餘嬌騁先將獨立雙絕不俱標

行幸甘泉宮

漢書武帝太始三年正月行幸甘泉宮

梁簡文帝

雉歸海水寂裘來重譯通書看五十里隨處宿離宮鼓聲恒入地塵飛上暗空尚書隨豹尾太史逐相風銅鳴

周國鏃旗曳楚雲虹倖臣射覆罷從妓新歌終董桃拜

金紫賢妻侍禁中不羨神仙侶排煙逐駕鴻尚一作赦妓一作騎

同前題末有歌字

劉孝威

漢家迎夏畢避暑甘泉宮棧車鳴里鼓駟馬駕相風校

尉烏桓騎待制樓煩弓後旌猶五柞前笳度九嶷才人

豹尾內御酒屬車中輦迴百子閣扇動七輪風鳴鐘休

衛士披圖召後宮材官促校獵涼秋戲射熊涼秋一作秋來

名士悅傾城題云和湘東王藝文作昭明非梁簡文帝

美人稱絕世麗色譬花叢雖居李城北住在宋家東教

歌公主第學舞漢成宮多遊淇上水好在鳳樓中履高

疑上砌裾開特畏風衫輕見跳脫珠概雜青蟲垂絲遶
帷幔落日度房櫳粧牕隔柳色井水照桃紅非憐江浦

佩羞使春閨空

住在一作往來
江浦一作交甫

同前

題云敬酬劉長史
詠名士悅傾城

劉緩

不信巫山女不信洛川神何關別有物還是傾城人經
共陳王戲曾與宋家鄰未嫁先名玉來時本姓秦粉光
猶似面朱色不勝唇遙見疑花發聞香知異春釵長逐
鬟髮祿小稱腰身夜夜言嬌盡日日態還新工傾荀奉
倩能迷石季倫上客徒留目不見正橫陳

髮一作鬢

獨處怨

司馬相如美人賦曰芳香郁烈黼帳高張
有女獨處婉然在牀乃歌曰獨處室兮廓

無依思佳人兮情傷悲獨處
怨蓋取諸此一作獨處愁

梁簡文帝

獨處恒多怨開幕試臨風彈碁鏡奩上傅粉高樓中自

君征馬去音信不曾通只恐金屏掩明年已復空

君一作從

樹中草

一作蕭子顯

梁簡文帝

幸有青袍色聊因翠幄凋雖間珊瑚帶非是合歡條

半路溪

樂府作元帝

梁簡文帝

相逢半路溪隔溪猶不渡望望判知是翩翩識行步摘

贈蘭澤芳欲表同心句先將動舊情恐君疑妾妬

將一作持

春情曲

詞品曰梁簡文春情曲似七言律而未句
人用五言王無功亦有此體又唐律之祖

而唐辭瑞鵲鵲格韻似之今按其集題云春情
初不言曲且陳隋人亦多春情詩楊氏或別有

據聊附
于此

梁簡文帝

蝶黃花紫燕相追楊低柳合露塵飛已見垂鈎挂綠樹
誠知淇水霑羅衣兩童夾車問不已五馬城南猶未歸
鶯啼春欲駛無爲空掩扉

倡樓怨節

宋鄭樵樂府遺聲怨思二十五曲有倡樓怨簡文又有倡婦怨情十二韻詩不

錄

梁簡文帝

朝日斜來照戶春鳥爭飛出林片光片影皆麗一聲一
轉煎心上林紛紛花落淇水漠漠苔浮年馳節流易盡
何爲忍憶含羞

此疑
二首

金閨思

按閨思閨怨或叙棄捐或陳征戍大畧皆懷遠傷離之意魏曹植有閨情詩至梁陳

間始爲此題唐益多擬作矣郭左諸家俱不見
載樂府遺聲有閨思閨怨秋閨怨今從之其他

各以
類附

梁簡文帝

遊子久不返妾身當何依日移孤影動羞覩燕雙飛
自君之別矣不復染膏脂南風送歸雁聊以寄相思

閨思

梁范雲

春草醉春煙深閨人獨眠積恨顏將老相思心欲然幾
回明月夜飛夢到郎邊

同前

隋羅愛愛

幾當孤月夜遙望七香車羅帶因腰緩金釵逐髻斜

春閨思

梁蕭子顯

金羈遊俠子綺機離思妾春度人不歸望花盡成葉

秋閨夜思

梁簡文帝

非關長信別詎是良人征九重忽不見萬恨滿心生夕
門掩魚鑰宵牀悲畫屏迴月臨牕渡吟蟲繞砌鳴初霜
實細葉秋風驅亂螢故粧猶累日新衣製未成欲知妾
不寐城外搗砧聲

驅一作吹

閨怨

玉臺作蕭綸題云
代秋胡婦閨怨

梁元帝

蕩子從遊宦思妾守房櫳塵鏡朝朝掩寒衾夜夜空若
非新有悅何事久西東知人相憶否淚盡夢啼中

同前

二首

吳均

胡笳屢悽斷征蓬未肯還妾坐江之介君戍小長安相
去三千里參商書信難四時無人見誰復重羅紃

春草可攬結妾心正斷絕綠髻愁中改紅顏啼裏滅非

獨淚成珠亦見珠成血願爲飛鵲鏡翩翩照離別

飛鵲一作

雙文鵲

同前

劉孝儀

本無金屋寵長作玉階悲一乖西北麗寧復城南期永

巷愁無歇應門閉有時空勞織素巧徒爲團扇辭匡牀

終不共何由橫自私

歇玉臺作盡

同前

陸罩

自憐斷帶日偏恨分釵時留步惜餘影含意結愁眉徒
知今異昔空使怨成思欲以別離思獨向蘼蕪悲

同前

一云和陰梁州
襍怨今從藝文

鄧鏗

暫別猶添恨何忍別經時叢桂頻銷葉庭樹幾攀枝君
言妾貌改妾畏君心移終須一相見併得兩相知

同前

題云閨
怨篇

陳江揔

寂寂青樓大道邊紛紛白雪綺窻前池上鴛鴦不獨自
帳中蘇合還空然屏風有意障明月燈火無情照獨眠
遼西水凍春應少薊北鴻來路幾千願君關山及早度
念妾桃李片時妍

同前

藝文作江摠次閨怨篇下玉臺作梁簡文和蕭子顯春別

蜘蛛作絲滿帳中芳草結葉當行路紅臉脉脉一生啼
黃鳥飛飛有時度故人雖故昔經新新人雖新復應故

同前

陳吳思玄

金風響洞房佳人心自傷淚隨明月下愁逐漏聲長燈
前羞獨鵲枕上怨孤凰自覺鴛帷冷誰憐珠被涼

同前

周庾信

明鏡圓花發空房故怨多幾年留織女還應聽渡河

春閨怨

梁王僧孺

愁來不理髻春至更攢眉悲看蛺蝶粉泣望蜘蛛絲月

映寒蛩褥風吹翡翠帷飛鱗難託意駛翼不銜辭

銜一作綴

同前

吳孜

玉關信使斷借問不相諳春光太無意窺牕來見參分
與光音絕忽值日東南柳枝皆颺燕桑葉復催蠶物色
頓如此孀居自不堪

秋閨怨

梁王僧孺

斜光隱西壁暮雀上南枝風來秋扇屏月出夜燈吹深
心起百際遙淚非一垂徒勞妾辛苦終言君不知

同前

二首一云閨怨今從玉臺

何遜

竹葉響南牕月光照東壁誰知夜獨覺枕前雙淚滴

閨閣行人斷房櫳月影斜誰能北窻下獨對後園花

集作

誰知北窻下
猶對後園花

同前

陳陰鏗

獨眠雖已慣秋來只自愁火籠恒煖脚行障鎮牀頭
眉含黛俱歛啼將粉共流誰能無別恨唯守一空樓

離閨怨

題云
和蕭
諮議本

梁何遜

曉河沒高棟斜月半空庭窻中度落葉簾外隔飛螢
含情下翠帳掩涕閉金屏昔期今未返春草寒復青
思君無轉易何異北辰星

情一作悲
一作泣

空閨怨

陳江攄

蕩妻怨獨守盧姬傷獨居
瑟上調絃落機中織素餘
自羞淚無燥翻覺夢成虛
復嗟長信閣寂寂往來踈

南征閨怨

陳陰鏗

湘水舊言深征客理難尋
獨愁無處道長悲不自禁
逢人憎解佩來鴻懶聽音
唯當有夜鵲南飛似妾心

來鴻一作從來

山家閨怨

陳張正見

王孫春好遊雲鬢不勝愁
離鴻暫罷曲別路已經秋
山中桂花晚勿爲俗人留

同前

李爽

山中多早梅荆扉達曙開
竹巾君自拆荷衣誰爲裁
行

雲無處所人住在陽臺

晚棲鳥

文苑英華作樂府姑從之
隋虞世基有晚飛鳥不錄

梁元帝

日暮連翩翼俱向上林棲風多前鳥駛雲暗後羣迷路
遠聲難徹飛斜行未齊應從故鄉返幾過入蘭閨借問
倡樓妾何如蕩子妻

攜手曲

攜手曲梁沈約所制也樂府解題曰攜手
曲言攜手行樂恐芳時不留君恩將歇也

梁沈約

捨轡下雕輅更衣奉玉牀聯簪映秋水開鏡比春粧所
畏紅顏促君恩不可長鵷冠且容裔豈吝桂枝一作枝一作枝

同前

吳均

豔裔陽之春
攜手清洛濱
雞鳴上林苑
薄暮小平津
長裾藻白日
廣袖帶芳塵
故交一如此
新知詎憶人

夜夜曲

二首北斗一首一作簡文夜夜曲梁沈約所作也樂府解題曰夜夜曲傷獨處也

梁沈約

河漢縱且橫
北斗橫復直
星漢空如此
寧知心有憶
孤燈暖不明
寒機曉猶織
零淚向誰道
雞鳴徒歎息
北斗闌干去
夜夜心獨傷
月輝橫射枕
燈光半隱牀

同前

二首後首樂府無名氏玉臺作簡文題云擬沈隱侯故附約後

簡文帝

霽霽夜中霜河開向曉光枕啼常帶粉身眠不著牀蘭
膏盡更益薰鑪滅復香但問愁多少便知夜短長

愁人夜獨傷滅燭臥蘭房祗恐多情月旋來照妾牀

樂未央

梁沈約

億舜日萬堯年詠湛露歌採蓮願襍百和氣宛轉金鑪

前

六憶詩

四首

梁沈約

憶來時灼灼上堦墀勤勤叙離別慊慊道相思相看常
不足相見乃忘饑

憶坐時點點羅帳前或歌四五曲或弄兩三弦笑時應

無比嗔時更可憐

憶食時臨盤動容色欲坐復羞坐欲食復羞食含哺如
不饑擊甌似無力

憶眠時人眠彊未眠解羅不待勸就枕更須牽復恐傍
人見嬌羞在燭前

襍憶詩

二首見隋遺錄題云效劉孝綽襍憶詩按
劉集無此詩惟沈約有六憶詞品作煬帝

夜飲朝
眠曲

隋煬帝

憶睡時待來剛不來卸粧仍索伴解佩更相催博山思
結夢沈水未成灰

憶起時投籤初報曉被惹香黛殘枕隱金釵裊笑動林

樂苑 卷三
中鳥除却司晨鳥

笑動林中鳥一作笑動上林中

征怨

梁江淹

蕩子從征久鳳樓簫管閒獨枕凋雲髻孤燈損玉顏何
日邊塵淨庭前征馬還

同前

題云敬酬柳僕射

丘遲

清歌自信妍雅舞空僊僊耳中解明月頭上落金鈿雀
飛且近遠暮入綺牕前魚戲雖南北終還荷葉邊惟見
君行久新年非故年

登城怨

梁范雲

楚妃歌脩竹漢女奏幽蘭獨以閨中笑豈知城上寒

登高臺

梁王僧孺

試出金華殿聊登銅雀臺九路平如掌千門洞已開軒
車映日過簫管逐風來若非邯鄲美便是洛陽才

掌一作砥

同前

題云宮殿名
登高臺詩

陳祖孫登

獨有相思意聊敞鳳皇臺蓮披香稍上月明光正來離

鵠將雲散飛花似雪迴遙思竹林友前牕夜夜開

鵠一作鶴

古通用

滄海雀

梁張率

大雀與黃口來自滄海區清晨啄原粒日夕依野株雖
憂驚鳥擊長懷沸鼎虞況復隨時起翻飛不可拘寄言

樂府 卷三
挾彈子莫賤隋侯珠

清涼

梁張率

登臺待初景
帳殿藹餘晨
羅帳夕風濟
清氣尚波人
長簾涼可仰
平莞溫未親
幸願同枕席
爲君橫自陳

芳林篇

梁柳惲

芳林曄兮發朱榮
時旣晚兮隨風零
隨風零兮返無期
安得陽華遺所思

起夜來

樂府解題曰起夜來其辭意猶念疇昔思君之來也

梁柳惲

城南斷車騎
閣道覆青埃
露華光翠網
月影入蘭臺
洞

房且莫掩應門或復開颯颯秋桂響非君起夜來

獨不見

樂府解題曰獨不見傷思而不得見也

梁柳惲

別島望雲臺天淵臨水殿芳草生未積春花落如霰出
從張公子還過趙飛燕奉帚長信宮誰知獨不見

同前

王訓

日晚宜春暮風軟上林朝對酒近初節開樓蕩夜嬌石
橋通小澗竹路上青霄持底誰見許長愁成細腰

同前

劉孝威

夫婿結纓簪偏蒙漢寵深中人引卧內副車遊上林綬
綵瑯琊草蟬鑄武威金分家移甲第留妾住河陰獨寢

樂苑
卷三八
鴛鴦被自理鳳皇琴誰憐雙玉筯流向復流襟

送歸曲

梁吳均

送子獨南歸攬衣空閔默關山晝欲暗河水夜向塞燕
至他人鄉鴈去還誰國寄子兩行書分明達濟北

秦王卷衣

樂府解題曰秦王卷衣言咸陽春景及宮闕之美秦王卷衣以贈所歡也

梁吳均

咸陽春草芳秦帝卷衣裳玉檢茱萸匣金泥蘇合香初
芳薰復帳餘輝耀玉牀當須晏朝罷持此贈龍陽

龍一作華

妾安所居

梁吳均

賤妾先有寵蛾眉進不遲一從西北麗無復城南期何

因暫豔逸豈爲乏妍姿徒有黃昏望寧遇青樓時惟惜
應門掩方餘永巷悲匡牀終不共何由橫自私因一作

大垂手

樂府解題曰大垂手小垂手皆言舞而垂其手也隋江總婦病行曰夫婿府中趨誰能大垂手是也又獨搖手亦與此同此與小垂手二首藝文作簡文帝

梁吳均

垂手忽迢迢飛燕掌中嬌羅衫恣風引輕帶任情搖詎
似長沙地促舞不回腰

小垂手

梁吳均

舞女出西秦躡影舞陽春且復小垂手廣袖拂紅塵折
腰應兩笛頓足轉雙巾蛾眉與曼臉見此空愁人

夾樹

梁吳均

桂樹夾長陂。復值清風吹。
氛氲採芳葉。連綿交密枝。
能迎春露點。不逐秋風移。
願君長惠愛。當使歲寒知。

城上麻

梁吳均

麻生滿城頭。麻葉落城溝。
麻莖左右披。溝水東西流。
少年感恩命。奉劒事西周。
但令直心盡。何用返封侯。

邊城將

四首

梁吳均

塞外何紛紛。胡騎欲成羣。
爾時始應募。來投霍冠軍。
刀含四尺影。劒抱七星文。
袖間血灑地。車中旌拂雲。
輕軀如未殞。終當厚報君。

僕本邊城將馳射靈關下箭銜鴈門石氣振武安瓦勳
輕賞廢丘名高拜橫野留書應鑿楹傳功須勒社徒傾
七尺命酬恩終自寡

聞君報一食遠送出平野玉標丹霞劍金絡豔光馬高
旗入漢飛長鞭歷地寫曙星海出曉月山頭下歲晏
坐論功自有思臣者

臨淄重蹴鞠曲城好擊刺不要身後名專騁眼前智君
看班定遠立功不負義掣拽二丈旗躑躅雙鳬騎但問
相知否死生無險易

春怨

梁吳均

樂苑
四時如湍水飛奔競迴復夜鳥響嚶嚶朝花照煜煜厭
見花成子多看筍成竹萬里斷音書十載異栖宿積愁
落芳髻長啼壞美目君去往榆關妾留住函谷唯對昔
耶房如愧蜘蛛屋獨喚響相酬還持影自逐象牀易氊
簾羅衣變單複幾過度風霜猶能保乳獨成一作爲

江潭怨

一作贈
別新林

梁吳均

僕本幽并兒抱劍事邊陲風亂青絲絡霧染黃金羈天
子既無賞公卿竟不知去去歸去來還傾鸚鵡杯氣爲
故交絕心爲新知開但令寸心是何須銅雀臺

邊城思

梁何遜

柳黃未吐葉水綠半含苔春色邊城動客思故鄉來

南征曲

梁蕭子顯

櫂歌來揚女操舟驚越人圖蛟怯水伯照鵲竦江神

同前

題云南征

陳蘇子卿

一朝遊桂水萬里別長安故鄉夢中近邊愁酒上寬劍
鋒但須利戎衣不畏單南中地氣暖少婦莫愁寒

春思

按李白集春思秋思並編入樂府蕭子雲已有此豈白亦擬梁人邪

梁蕭子雲

春風蕩羅帳餘花落鏡奩池荷正捲葉庭柳復垂簷竹
柏君自改團扇妾方嫌誰能憐故素終爲泣新縑

簷一作縑

秋思

顏氏家訓曰蘭陵蕭慤工於篇什嘗有秋思詩云芙蓉露下落楊柳月中疎時人未之賞也吾愛其蕭散宛然在目賴川荀仲舉瑯琊諸葛漢亦以為爾而盧思道之徒雅所不愜

北齊蕭慤

清波收潦日華林鳴籟初芙蓉露下落楊柳月中疎燕

幃細綺被趙帶流黃裾相思阻音息結夢感離居

息玉臺作

信

襍曲

二首

梁王筠

烏還夜已逼蟲飛曉尚賒桂月徒留影蘭燈空結花

鳥一作

可憐洛城東芳樹搖春風丹霞映白日細雨帶輕虹

同前

江總徐陵同賦

陳傅綽

新人新寵住蘭堂。翠帳金屏玳瑁牀。叢星不似珠簾色。
度月還同粉壁光。從來著名推趙子。復有丹唇發皓齒。
一嬌一態本難逢。如畫如花定相似。樓臺宛轉曲皆通。
弦管逶迤徹下風。此殿笑語長相共。傍省歡娛不復同。
訝許人情太厚薄。分恩賦念能斟酌。多作繡被爲雙鴛。
長弄綺琴憎別鶴。人今投寵要須堅。會使歲寒恒度前。
共取辰星作心抱。無轉無移千萬年。

牀一作梁同作如長相作恒長雙鴛

一作鴛鴦

同前

徐陵

傾城得意已無儔洞房連閣未消愁宮中本造鴛鴦殿
爲誰新起鳳皇樓綠黛紅顏兩相發千嬌百念情無歇
舞衫迴袖勝春風歌扇當牕似秋月碧玉宮妓自翩妍
絳樹新聲最可憐張星舊在天河上從來張姓本連天
二八年時不憂度傍邊得寵誰應妬立春曆日自當新
正月春幡底須故流蘇錦帳挂香囊織成羅幌隱燈光
祇應私將琥珀枕暝暝來上珊瑚牀

最一作自
應一作相

同前

三首

江總

行行春逕靡蕪綠織素那復解琴心乍愜南階悲綠草
誰堪東陌怨黃金紅顏素月俱三五夫婿何在今追虜

關山隴月春雪冰誰見人啼花照戶

冰一作深
追一作征

殿內一處起金房併勝餘人白王堂珊瑚挂鏡臨網戶
芙蓉作帳照雕梁房櫳宛轉垂翠幕佳麗逶迤隱珠箔
風前花管颺難留舞處花鈿低不落陽臺通夢太非真
洛浦淩波復不新曲中唯聞張女調定有同姓可憐人
但願私情賜斜領不願傷人相比竝妾門逢春自可榮
君向未秋何意冷

併玉臺作便張女
調一作張女曲

泰山言應可轉移新寵不信更參差合歡錦帶鴛鴦鳥
同心綺袖連理枝皎皎新秋明月開早露飛螢暗裏來
鯨燈落花殊未盡虬水銀箭莫相催非是神女期河漢

別有仙姬入吹臺未眠解着同心結欲醉那堪連理杯
後宮不慙茱萸芳夜夜爭開蘇合房寶釵翠髻還相似
朱唇玉面非一行新人未語言如澀新寵無前判不臧
願奉更衣蘭麝氣恐君馬到自驚香

遺所思

樂府遺聲怨思二十五曲有遺所思按楚辭九歌云折芳馨兮遺所思疑本出此

梁劉孝綽

遺簪彫玳瑁贈綺織鴛鴦未若華滋樹交枝蕩子房別
前秋已落別後春更芳所思不可寄唯憐盈袖香

舞就行

梁劉孝儀

依歌移弱步傷竹艷新粧徐來翻應節亂去反成行

雀乳空井中

晉傅玄詩曰鵲巢丘城側雀乳空井中居不附龍鳳常畏地與蟲依賢義

不恐近暴自當窮雀乳空井中亦非樂府

梁劉孝威

遠去條支國心知漢德優聊棲丞相府過令黃霸羞挾

子須閑地空井共尋求轆轤絲綆絕枯槁冬蘚周將憐

羽翼長唯辭各背遊

優一作休長一作張

半渡溪

樂府解題曰半渡溪言戰而半涉溪水見迫所言皆嶺南地里與武溪深相類梁元

帝又有半路溪則言相逢隔溪已識行步辭音與此全殊

梁劉孝威

本廁偏伍伴一戰殄凶渠制賜文犀節驛報紫泥書入

營陳御蓋還家乘紫車皇恩空以重丹心恨不紆渡瀘

且不畏凌溪嗟有餘

空以重一作知已重

絲管列舞席陳含聲未奏待嘉賓
羅絲管舒舞席歛袖嘿唇迎上客

送客曲

梁徐勉

袖續紛聲委咽餘曲未終高駕別
爵無筭景已流空紆長袖客不留

採荷調

樂府廣題曰梁太尉從事中郎江從簡年十七有才思爲採荷調以刺何敬容敬容覽之不覺嗟賞愛其巧麗敬容時爲宰相一作採蓮諷

梁江從簡

欲持荷作柱荷弱不勝梁欲持荷作鏡荷暗本無光

發白馬

通典曰白馬春秋時衛國曹邑有黎陽津一曰白馬津酈生云守白馬之津是也發

白馬言征戍而發兵於此也

梁費昶

家本樓煩俗召募羽林兒怖羗角觝戲習戰昆明池弓
弦不復挽劒永恒露鉞一辭豹尾內長別屬車垂白馬
今雖發黃河未結澌寄言閨中婦逢春心勿移

濟黃河

題云應教

梁謝微

積陰晦平陸淒風結暮序朝辭金谷戌夕逗黃河渚赤
兔徒聯翩青鳬詎容與淚甚聲難發悲多袖未舉虛薄
謬君恩方嗟別宛許

成一作樹

同前

題云奉和濟黃河應教
本梁人此疑與謝微同作

北齊蕭慤

大蕃連帝室驂駕奉皇猷未明驅羽騎凌晨方畫丹津
城度維錦岸柳夾緹油鐘聲颺別島旗影照蒼流早光

生劒服朝風起節樓滔滔細波動裔裔輕舫浮迴橈避
近磧放舳下前洲全疑上天漢不異謁蓬丘望知雲氣
合聽識水聲秋從君何等樂喜從神仙遊

鍾一作饒

同前

六朝聲偶作柳顧言

陳江總

蔥山淪外域鹽澤隱遐方兩源分際遠九道派流長未
殫所聞見無待驗詞章留連嗟太史惆悵踐黎陽導波

縈地節䟽氣耿天潢憫周沉用寶嘉晉肇爲梁

節一作脉

陵雲臺

魏志曰文帝黃初元年十二月初營洛陽宮戊午幸洛陽三年築陵雲臺劉義慶世

說曰陵雲臺樓觀精巧先秤衆木輕重然後構造無錙銖相負揭臺高峻恒隨風動搖揚龍驤

洛陽記曰陵雲臺高二

十三丈登之見孟津也

梁謝舉

綺薨懸桂棟，隱曖傍喬柯。勢高凌玉井，臨迴度金波。易
覺涼風至，早飛秋鴈過。高臺相思曲，望遠騷人歌。幸屬
此迢遞，知承雲霧多。

屬一作屬

同前

周王褒

高臺懸百尺，中夕殊未窮。北臨酸棗寺，西眺明光宮。城
旁抵雙府，林裏對相風。書題鹿盧榜，觀寫飛廉銅。牕開
神女電，梁映美人虹。虞捐濫天寵，鄭督特懷忠。莊生垂
翠釣，昭儀抵鬪熊。馳輪有盈缺，人道亦汙隆。還念西陵
舞，非復鄴城中。

抵一作抵

伍子胥

梁鮑機

忠孝誠無報感義本投身日暮江波急誰憐漁丈人楚

墓悲猶在吳門恨未申

猶一作空
恨一作怨

建興苑

題云遊
建興苑

梁紀少瑜

丹陵抱天邑紫淵更上林銀臺懸百仞玉樹起千尋水

流冠蓋影風揚歌吹音踟躕憐拾翠顧步惜遺簪日落

庭光轉方幔屢移陰願言樂未極不道愛黃金

幔一作憶
願一作終

短簫

梁張嶠

促柱弦始繁短簫吹初亮舞袖拂長席鐘音由簾颺已

落簷瓦間復繞梁塵上時屬清夏陰恩暉亦非望

田飲引

梁朱异

卜田宇兮京之陽面清洛兮背脩卽屬風林之蕭瑟值
寒野之蒼茫鵬紛紛而聚散鴻冥冥而遠翔酒沈兮俱
發雲沸兮波揚豈味薄於東魯鄙蜜甜于南湘於是客
有不速朋自遠方臨清池而滌器闢山牖而飛觴促膝
兮道故久要兮不忘間談希夷之理或賦連翩之章

車馬行

梁戴嵩

輦洛風塵處冠蓋相填咽多稱魏其冷競隨田蚡熱輪
趣白虎第珂聚黃金穴獻酒悉葡萄訓言盡飛鐵東都
虵已鑄西山綬應結期集類蒸煙晚至如吹雪子雲爾
何事門巷無車轍

薄暮動弦歌

梁沈君攸

柳谷向夕沈餘日蕙樓臨砌徙斜光金戶半入藁林影
蘭徑時移落藥香絲繩玉壺傳綺席秦箏趙瑟響高堂
舞裙拂履喧珠珮歌響出扇繞塵梁雲邊雪飛弦柱促
留賓但須羅袖長日暮歌鐘恒不倦處處行樂爲時康

羽觴飛上苑

楚辭曰瑤漿密勺實羽觴張衡西京賦曰促中堂之俠坐羽觴行而無筭

羽觴謂杯上綴羽以速飲漢書音義曰羽觴作生爵形是也

梁沈君攸

上路薄晚風塵合禁苑初春氣色華石徑斷絲闌蔓草
山流細沫擁浮花魚文熠燿含餘日鶴蓋低昂照落霞
隔樹銀鞍喧寶馬分衢玉軸動香車車馬處處盡成陰

班荆促席對芳林，藤杯屢動情仍暢。
翠樽引滿趣彌深，山陽倒載非難得。
宜城醇醞促須斟，半醉驪歌應可奏。
上客莫慮擲黃金。

浮花一作浮槎

桂檝汎河中

梁沈君攸

黃河曲注通千里，濁水分流引入川。
仙查逐源終未極，蘇亭遺跡尚難遷。
眇眇雲根侵遠樹，蒼蒼水氣襍遙天。
波影襍霞無定色，湍文觸岸不成圓。
赤馬青龍交出浦，飛雲益海遠凌煙。
蓮舟渡沙轉不礙，桂檝距浪弱難前。
風急金烏翅自轉，汀長錦纜影微懸。
榜人欲歌先扣枻，津吏猶醉強持船。
河隄極望今如此，行杯落葉詎虛傳。

蘇亭一作漢帝僕
一作合龍一作驪

晨風行

晨風本秦詩也晨風詩曰馳彼晨風鬱彼北林傳曰馳疾飛貌晨風鸛也言穆公招賢人賢人往之疾如晨風之入北林也王循霧

開九曲瀆沈氏理檝令舟人但歌晨朝之風爾

梁王循

霧開九曲瀆風起千金堤岸回分野逕林際成牛蹊
隨落潮去日傍綺霞低望目輕舟隱瑟瑟遠寒悽還眺

小平急宴語方難齊

口一作日

同前

沈滿願

理檝令舟人停艫息旅泊河津念君劬勞冒風塵臨路
揮袂淚沾巾颶流勁潤逝若飛山高帆急絕音徽留子

句句獨言歸中心
熒熒將依誰風彌
葉落永離索神往
形返情錯漠循帶
易緩愁難却心之
憂矣頗銷鑠

一旦歌

樂府無名次
王臺卿詩後

一旦被頭痛避頭
還着牀自無親伴
侶誰當給水漿匍
匐入山院正逢虎
與狼對虎低頭啼
垂淚淚千行

映水曲

梁沈滿願

輕髻學浮雲雙蛾
擬初月水澄正落
釵萍開理垂髮

登樓曲

梁沈滿願

憑高川陸近望遠
阡陌多相思隔重
嶺相憶限長河

限一作恨

恨

越城曲

樂府作無名氏
與登樓曲相次

別怨悽歌響離啼濕舞衣願假烏棲曲翻從南向飛

聽鐘鳴

梁書曰綜武帝第二子封豫章王綜母齊東昏美人武帝滅齊納之七月而生綜綜

自以本東昏子及爲都督南兖州刺史聞齊建安王蕭寶寅在魏乃與數騎奔魏以爲侍中太尉綜旣不得志嘗作聽鐘鳴悲落葉辭以申其志大畧曰云云當時見者莫不悲之南史事同而無其辭洛陽伽藍記曰洛陽城東建陽里有臺高三丈上作二精舍有鐘撞之聞五十里太后移在宮內凝閑室初豫章王蕭綜聞此鐘聲遂造聽鐘歌三首行于世按梁書二辭各三首似與記合但存其畧耳藝文詩
梁蕭綜

聽鐘鳴當知在帝城參差定難數歷亂百愁生去聲懸
窈窕來響急徘徊誰憐傳漏子辛苦建章臺

聽鐘鳴聽聽非一所懷瑾握瑜空擲去攀松折桂誰相
許昔朋舊愛各東西譬如落葉不更齊漂漂孤雁何所
栖依依別鶴夜半啼

聽鐘鳴聽此何窮極二十有餘年淹留在京域窺明鏡
罷容色雲悲海思徒拚抑

悲落葉

梁蕭綜

悲落葉連翩下重疊落且飛從橫去不歸

悲落葉落葉悲人生譬如落葉不可持

悲落葉落葉何時還凡昔共根本無復一相關

聽鐘鳴

此或聽鐘鳴
全篇之一

歷歷聽鐘鳴當知在帝城西樹隱落月東牕見曉星
霧露朏朏未分明烏啼啞啞已流聲驚客思動客情
客思鬱縱橫翩翩孤鴈何所栖依依別鶴半夜啼今
歲行已暮雨雪向淒淒飛蓬旦夕起楊柳尚翻低氣
鬱結涕滂沱愁思無所託強作聽鐘歌

悲落葉

此至高下任飄颺或是悲落葉全篇之一
後云悲落葉落葉何時還或別一篇

悲落葉聯翩下重疊重疊落且飛從橫去不歸長枝
交蔭昔何密黃鳥關關動相失夕葉襍凝露朝花翻
亂日亂春日起春風春風春日此時同一霜兩霜猶
可當五晨六旦已颯黃乍逐驚風舉高下任飄颺悲

落葉落葉何時還夙昔共根本無復一相關各隨灰

土去高枝難重攀

綜終于魏詩紀編入北魏然其本傳在梁今附梁後

古樂苑卷第三十八

終





